

四庫全書

集部

欽定四庫全書

集部

唐文粹卷十六上

詳校官庶吉士臣謝恭銘

助教臣常循覆勘

總校官檢討臣何思鈞

校對官編修臣盧 遂

謄錄監生臣陶鳴珂

欽定四庫全書

唐文粹卷十六上

宋姚鉉編

詩五

總七十四首

古調歌篇五

知己九

仰答韋司業垂訪五首

蕭穎士

博平鄭太守自廬山見訪卻之武陵立馬贈

別李白

攜新文詣張籍韓愈途中成

賈島

喜陳懿老自宛陵至示予新製三十餘篇

朱書

延康吟

賈島

交友四

審交

孟郊

答友問

白居易

北極贈李觀

韓愈

與馬異結交 盧仝

規誨四

示孟郊 孟浩然

自誠 司空圖

誠貪 釋子蘭

杏園即席上同年 曹鄴

紀贈五

讀張曲江詩集 釋皎然

上河陽李大夫

孟郊

奉贈張荊州

王昌齡

詠德上韋獫狁

歐陽詹

贈崔從事郎

孟郊

散逸七

漁父歌

李頎

紫谿翁歌

陸龜蒙

秋醉歌

張為

襄陽歌

李白

散人歌

陸龜蒙

貽張旭

李頎

春日醉起言志

李白

俠少二

戲作花卿歌

杜甫

秦宮詩

李賀

登覽十五

望廬山瀑布二首 李白

望山 賈島

登金陵鳳凰臺 李白

登黃鶴樓 崔顥

登嶺望 許鼎

過華陰 王昌齡

早霽南樓 張說

奉和早霽南樓 趙冬曦

奉陪登南樓

尹志

春遊南亭

韋應物

廬山謠寄盧侍郎虛舟

李白

登南岳事畢謁司馬道士

張九齡

奉使登終南山

王灣

終南山望餘雪作

祖詠

勝槩二十八

桃源行

劉禹錫

桃源行

王維

和登會稽山

孫逖

洪州祈雨是日輒應賦詩

張九齡

寄贈宋十一

田遊巖

敬答田徵君

宋之問

龍門八詠

劉長卿

宣城清溪二首

李白

入崖口五渡寄李適

宋之問

答宋十一見贈

李適

和崖口五渡

徐彥伯

初至崖口

宋之問

山中作

顧况

輞口遇雨憶終南山

裴迪

答裴迪

王維

出青門往南山下別業

薛據

夜歸鹿門歌

孟浩然

春泛若耶

綦母潛

荆山獨往姚係

歸四明

胡幽貞

尋西山隱者不遇

丘為

仰答韋司業垂訪五首

蕭穎士

呦呦食苹鹿常飲清泠川但悅豐草美寧知牢饌鮮
主人有幽意將以充林泉興網幸免傷蒙君復羈牽
高堂列衆賓廣坐鳴清弦俯仰轉驚惕徘徊獨憂煎
緬懷雲

巖路欲往無由緣物各有所好違之傷自然

神龜在南國緬邈湘川陰遊止蓮葉上歲時嘉樹林毒蟲且不近斤斧何由尋錯落負奇文熒煌耀丹金江山萬里餘淮海阻且深獨保貞素質不為寒暑侵一逢盛明代應見通靈心

晉代有儒臣當年富辭藻立言寄青史將以贊王道遼落緬歲時辛勤歷江島且言風波倦探涉豈為寶不遇庾征西云誰展懷抱士貧乏知己安得成所好

彭陽昔游說願謁南郢都王果尚未達况從夷節謨豈
知晉叔向無罪嬰囚拘臨難俟解紛獨知祁大夫舉讎
且不棄何必論親疎夫子覺者也其能遺我乎

關西一公子年貌獨青春被褐來上京翳然聲未振中
郎何為者倒屣驚座賓詞賦豈不佳盛名亦相因為君
奏此曲此曲多苦辛千載不可誣孰言今無人

博平鄭太守自廬山千里相尋入江夏北市門見
訪邵之武陵立馬贈別

李白

大梁貴公子氣蓋蒼梧雲若無三千客誰道信陵君救
趙復存魏英威天下聞邯鄲能屈節博訪從毛薛夷門
得隱淪而與侯生親仍要鼓刀者乃是袖鉞人好士不
盡心何能保其身多君重然諾意氣遙相託五馬入市
門金鞍照城郭都望虎竹貴且與荷衣樂去去桃花源
何時見歸軒相思無終極腸斷朗江猿

攜新文詣張籍韓愈途中成

賈島

袖有新成詩欲見張韓老青竹未生翼一步萬里道仰

望青冥天雲雪壓我腦失却終南山惆悵滿懷抱安得
西北風身願變蓬草地祇聞此語突出驚我倒

喜陳懿老自宛陵至示予新製三十餘篇

朱 畫

一別一千日一日十二憶苦心無閒時今夕見玉色玉
色復何異紅明含羣德有文如星宿飛入我胃臆憂愁
方破懷懽喜重補塞使我心兒全且非黃金力將攀下

風手願假僊鸞翼

予欲訪詩人孟郊
故寄誠於章句

延康吟

賈島

寄居延壽里為與延康隣
不愛延康里愛此里中人人
非十年故人非九族親人有
不朽語得之烟山春

審交

孟郊

種樹須擇地惡土變木根
結交若失人中道生謗言君
子芳桂性春濃寒更繁小人
槿花心朝在夕不存莫躡
冬冰堅中有潛浪翻唯當金
石交可與賢達論

答友問

白居易

大圭庶不割利劍用不缺當其斬馬時良玉不如鐵置
鐵在洪鑪鐵銷易如雪良玉同其中三日燒不熱君疑
才與德詠此知優劣

北極贈李觀

韓愈

北極有羈羽南溟有沉鱗川源浩浩隔影響兩無因風
雲一朝會變化成一身誰言道里遠感激疾如神我年
二十五求友昧其人哀歌西京市乃與夫子親所向苟
同趣賢愚豈異倫方為金石姿萬世無緇磷無為兒女

態憔悴悲賤貧

與馬異結交

盧仝

天地日月如等閒
盧仝四十無往還
唯有一片心脾骨
巉巖萃砢兀鬱律
刀劍為鋒鏑
平地放著高如崑崙
山天不容地
不受日月不敢偷
照耀伏羲畫八卦
鑿破天心胃
女媧伏羲妹
恐天怒
搏鍊五色石
引日月之針
五星之縷
把天補補了三日
不肯歸壻家
走向日中放
老鴟月裏栽
桂養蝦蟇
天公發怒化龍蛇
此龍此蛇得

死病神農合藥救死命天怪神農黨龍蛇罰神農為牛
頭令載元氣車不知藥中有毒藥藥殺元氣天不覺爾
來天地不神聖日月之光無定正不知元氣元不死忽
聞空中喚馬異馬異若不是祥瑞空中敢道不容易昨
日全不同異自異是謂大同而小異今日全自同異不
異是謂同不往兮異不至直當中兮動天地白玉璞裏
斲出相思心黃金鑄裏鑄出相思淚忽聞空中崩崖倒
谷聲絕勝明珠千萬斛買得西施南威一雙婢此婢嬌

饒惱殺人凝脂為膚翡翠裙唯解畫眉朱點唇自從獲
得君敲金捉玉凌浮雲却返顧一雙婢子何足云平生
結交苦少人憶君眼前如見君青雲欲開白日沒天眼
不見此奇骨縱橫奇又奇千歲萬歲枯松枝半折半殘
壓山谷盤根蹙節成蛟螭忽雷霹靂卒風暴雨撼不動
欲動不動千變萬化摠是鱗皴皮此奇怪物不可欺虛
全見馬異文章酌得馬異心中事風姿骨本恰如此是
不是寄一字

示孟郊

孟浩然

蔓草蔽極野蘭枝結孤根衆音何其繁伯牙獨不喧當時高深意舉世無能分鍾期一見知山水千秋聞爾其保靜節薄俗徒云云

自誠

司空圖

我祖銘座右嘉謀貽厥孫勤此苟不急令名日可存媒銜士所恥慈儉道所尊松柏豈不茂桃李亦自繁衆人皆察察而我獨昏昏取訓於老氏大辯欲納言

誠貪

釋子蘭

多求待心足未足旋傾覆
明知貪者心求榮不求辱

杏園即席上同年

曹 鄴

岐路不在天十年行不至
一旦公道開青雲在平地
枕上數聲鼓衡門已如市
白日探得珠不待驪龍睡
忿忿出九衢僮僕顏色異
故衣未及換尚有去年淚
晴陽照花影落絮浮野翠
對酒時忽驚猶疑夢中事
自憐孤飛鳥得接鸞鳳翅
永懷共濟心莫起胡越意

讀張曲江詩集

釋皎然

相公乃天啓人文佐生成立程正頽靡繹思何縱橫春
杼弄綳綺陽林敷玉英飄然飛動姿邈矣高簡情後輩
驚失步前修敢爭衡始欣耳目遠再思幾慮清體正力
已全理精識何妙昔年歌陽春徒推郢中調今朝聽鸞
鳳豈獨蘇門嘯帝命鎮雄州詩流據上游才兼荆衡秀
氣助瀟湘秋逸蕩子山匹經奇文暢傳沉吟未終卷變
態紛難數耀耳代明璫襲衣比芳杜悵悵聞玉聲寤寐

在靈府

上河陽李大夫

孟郊

上將秉神略至兵無血威三軍向嚴冬一撫勝重衣寒
劍奪衆景夜星失長暉蒼鷹獨立時惡鳥不敢飛武牢
鎖天關河橋紐地機大軍奚與安守此稱者稀貧士少
顏色貴門多輕肥試登山嶽高始見草木微山嶽恩既
廣草木心皆歸

奉贈張荊州

王昌齡

祝融之峯紫雲銜翠如何其雪嶺崑邑西有路緣石壁
我欲從之卧穹嵌魚有心兮脫網罟江無人兮鳴楓杉
王君飛鳥仍未去蘇耽宅中意遙緘

詠德上韋撿察

即韋相公之弟也

歐陽詹

少華類太華太室似少室亞相與丞相亦復無異質亭
如月臨水肅若松照日輝影互光澄陰森兩蔥鬱連枝
鸞鳳下同氣龜龍出併力革夷心通籌整師律英豪願
迴席蠻貊皆屈膝中外佇分途褰瀛待清謚

贈崔從事郎

孟郊

古人留清風千載遙贈君破松見貞心裂竹看直文殘
月色不改高賢德常新家懷詩書富宅抱草木貧安排
一蹄泉未化千尺鱗含意永不語釣璜幽水濱

漁父歌

李頎

白頭何老人蓑笠蔽其身避世當不仕釣魚清江濱浦
沙明濯足山月靜垂綸寓宿湍與瀨行歌秋復春持竿
湘岸竹藝火蘆洲薪綠水飯香稻青荷包紫鱗於中還

自樂所欲全吾貞而笑獨醒者臨流多苦辛

紫谿翁歌

并序

陸龜蒙

紫谿翁過甫里先生舉酒相屬醉而歌曰

一丘之木其栖深也屋吾容不辱一谿之石其居平也
席吾勞以息一竇之泉其音清也絃吾方在懸得乎人
得乎天吾不知所以然而然先生弁而賡之曰采江之
魚兮朝船有鱸采江之蔬兮暮筐有蒲左圖且書右琴
與壺壽歟天歟貴歟賤歟歌闋而去

秋醉歌

張為

金風颯已起還是招漁翁攜酒天姥岑自彈嶧陽桐脫
却登山屐赤脚翹青筇泉聲掃殘暑猿臂攀長松翠微
泛樽綠苔蘚分烟紅造化處術內相對數壺空醉眠嶺
上草不覺夜露濃一夢到天曉始覺一醉中皎然夢中
路直到瀛洲東初平把我臂相與騎白龍三留對上帝
玉樓十二重上帝賜我酒送我鼓金鐘寶閣香斂苒琪
樹寒玲瓏動葉如笙簧音律相怡融珍重此一醉百骸

出天地長如此夢魂永謝名與利

襄陽歌

李白

落日欲沒峴山西倒著接羅花下迷襄陽小兒齊拍手
攔街爭唱白銅鞮傍人借問笑何事笑殺山公醉似泥
鸕鷀杓鸚鵡盃百年三萬六千日一日須傾三百杯遙
看漢水鴨頭綠恰似蒲萄初醲醅此江若變作春酒壘
麴便築糟丘臺金鞍駿馬換小妾笑坐金鞍歌落梅車
傍側挂一壺酒鳳笙龍管行相催咸陽市上嘆黃犬何

如月下傾金壘君不見晉朝羊公一片石龜龍剥落生
莓苔淚亦不能為之墮心亦不能為之哀清風明月不
用一錢買玉山自倒非人推舒州杓力士璫李白與爾
同死生襄王雲雨今安在江水東流猿夜聲

散人歌

陸龜蒙

江湖散人天骨奇短髮搔來蓬半垂手捉孤篁曳寒繭
口誦太古滄浪詞詞云太古萬萬古民性甚楚無風期
夜棲止與禽獸雜獨自構架縱橫枝因而稱曰有巢氏

民共敬貴如君師當時只效烏鵲輩豈是有意陳尊卑
無端後聖穿鑿破一派前尊干流隨多方惱亂元氣死
日使父子生姦欺聖人事業轉消耗尚有漁者存熙熙
風波不獨因一士凡百器用皆能施眾疏扈腐鱸鰕脫止
失檢馭無讒疵人間所謂好男子我見婦女留須眉奴
顏婢膝真乞丐反以正直為狂癡所以頭欲散不散弁
戕巍所以腰欲散不散佩陸離行散任之適坐散從傾
欹語散空谷應笑散春容披衣散單複便食散酸鹹宜

書散混真草酒散甘醇醅屋散勢斜直樹散行參差客
散忘簪屨禽散空籠池外物一以散中心散何疑不共
諸侯分邑里不與天子專隍陴靜則守桑柘亂則逃妻
兒金鑣紳帶未嘗識白刃殺我窮生為或聞蕃將負恩
澤號令鐵馬如風馳大君年小丞相少當軸自請都旌
旗神鋒悉出羽林仗繪畫日月蟠龍螭太宗基業甚牢
固小醜背叛當殲夷禁軍近自肅宗署柳遇輔國爭雄
雌必然大段翦亮逆須召勁勇扶軍麾四方賊壘猶占

地死者暴骨生寒饑歸來輒擬荷鋤笠詬吏已責租錢
遲興師十萬一日費不啻千金何以支祇今利口且箕
斂何暇俛首哀惻嫠均荒補敗豈無術布在方策撐頽
臍冰霜襦袴易反掌白面諸郎殊不知江湖散人悲古
道悠悠幸寄羲皇傲官家未議活蒼生拜賜江湖散人
號

貽張旭

李頎

張公性嗜酒豁達無所營皓首窮草隸時稱太湖精露

頂據胡牀長叫三五聲興來洒素壁揮筆如流星下舍
風蕭條寒草滿戶庭問家何所有生事如浮萍左手持
蟹螯右手執丹經瞪目視霄漢不知醉與醒諸賓且方
坐旭日臨東城荷葉裏江魚白甌貯香粳微綠心不泄
放神於八紘時人不識者即是安期生

春日醉起言志

李白

處世若大夢胡為勞其生所以終日醉頽然卧前楹覺
來盼庭前一鳥花間鳴借問此何時春風語流鶯感之

欲嘆息對酒還自傾
浩歌待明月曲盡已忘情

戲作花卿歌

杜甫

成都猛將有花卿
學語小兒知姓名
用如快鶻風火生
見賊唯多身始輕
縣州副使著柘黃
我卿掃除即日平
子章髑髏血模糊
手提擲還崔大夫
李侯重有此節度
人道我卿絕世無
既稱絕世無天子
何不喚取守京都

秦宮詩

并序

李賀

秦宮漢將軍
梁冀之嬖奴也
秦宮得寵內舍故以驕名

大謬於人予撫舊而作辭似與馮子都之事相為對望
又欲二其昔有之詩

越羅夾衫迎春風玉刻麒麟腰帶紅樓頭曲宴仙人語
帳底吹笙烟霧濃人間酒暖春茫茫花枝入簾白日長
飛窻複道傳籌飲半夜朦朧膩燭黃禿襟小袖調鸚鵡
紫繡麻遮踏虎斫桂燒金待曉筵白鹿清蘓夜來煮
桐英永巷騎主馬內屋珍屏生色畫開門爛用水衡錢
卷起黃河向身瀉皇天厄運猶曾裂秦宮一生花裏活

鸞篋奪得不還人醉卧氍毹滿堂月

望廬山瀑布泉二首

李白

西登香廬峰南見瀑布水挂流三百丈噴壑數千里歛
如飛電來隱若白虹起初驚河漢落半灑雲天裏仰
觀勢轉雄壯哉造化功海風吹不斷江月照還空空中
亂灑射左右洗青壁飛珠散輕霞流沫沸穹石而我
遊名山對之心益閒且諧風所好永願辭人間
日照香鑪生紫烟遙看瀑布挂長川飛流直下三千尺

疑是銀河落九天

望山

賈島

南山三十里不見踰一旬
冒雨時立望望之如朋親
虬龍一掬波洗蕩一萬春日雨不斷
愁殺望山人
天事不可長
勁風來如奔
陰淫一已掃
浩翠寫國門
長安百萬家家張屏新
誰家最好山
我願為其隣

登金陵鳳凰臺

李白

鳳凰臺上鳳凰遊
鳳去臺空江自流
吳宮花草埋幽徑

晉國衣冠成古丘三山半落青天外二水中分白鷺洲
總為浮雲能蔽日長安不見使人愁

登黃鶴樓

崔顥

昔人已乘白雲去此地空餘黃鶴樓黃鶴一去不復返
白雲千載空悠悠晴川歷歷漢陽樹春草青青鸚鵡洲
日暮鄉關何處是烟波江上使人愁

登嶺望

許顥

淼淼三江水悠悠五嶺關鴈飛猶不度人去若為還

過華陰

王昌齡

雲起太華山，雲山五明滅。
東風始含景，了了見松雪。
羈人感幽棲，宵映轉奇絕。
欣然忘所疲，永望吟不輟。
信宿百餘里，出關玩新月。
何意昨冥冥，遇物遂遷別。
人生屢如此，何以肆愉悅。

早霽南樓

張說

山水佳，新霽南樓玩。
初旭夜來枝半紅，雨後洲全綠。
四運相終始，萬形紛代續。
適臨青草湖，再變黃鸝曲。
地穴

穿東武江流下西蜀歌聞枉渚遭舞見長沙促心遠居
無陋神和生自足白髮悲上春知當謝先欲

奉和早霽南樓

趙冬曦

閒曙躋南樓凭軒四遐矚物華蕩宣氣春景媚晴旭川
霽湘山孤林芳楚郊縟列巖重疊翠遠岸逶迤綠風帆
摩天垠漁艇散灣曲鴻歸鶴舞送猿叫鷺斷續羣動皆
熙熙噫予獨羈束常欽才子義忌鵬傷蹢躅雅尚騷人
文懷沙何迫促未知二賢意去矣從所欲

奉陪登南樓

尹 忭

君子每垂眷江山共流眄水遠林外明巖近霧中見終
日西北望何處是京縣屢登高春臺徒思淚如霰

春遊南亭

韋應物

川明氣已變巖寒雪尚擁南亭草心綠春塘泉脉動景
煦聽禽響雨餘看柳重逍遙池館華並愧專城寵

廬山謠寄盧侍御虛舟

李 白

我本楚狂人鳳歌笑孔丘手持綠玉杖朝別黃鶴樓五

岳尋仙不辭遠一生好入名山遊廬山秀出南斗傍屏
風九疊雲錦張影落明湖青黛光金闕前開二峯長銀
河倒瀉三石梁香爐瀑布遙相望迴崖沓嶂凌蒼蒼翠
影紅霞映朝日鳥飛不到吳天長登高壯觀天地間大
江茫茫去不還黃雲萬里動春色白波九道流雪山好
為廬山謠興因廬山發閒窺石鏡清我心謝公行處蒼
苔沒早服還丹無世情琴心三疊道初成遙見仙人採
雲裏手把芙蓉朝玉京先期汗漫九垓上願接盧敖遊

太清

登南岳事畢謁司馬道士

張九齡

將命祈靈岳迴策詣真士絕跡尋一徑異香聞數里分
庭八桂樹肅容兩童子入室希把袖登牀願啟齒誘我
棄智訣迨茲長生理吸精反自然鍊藥求不死斯言眇
霄漢顧予嬰紛滓相去九牛毛慙嘆知何已

奉使登終南山

王灣

常愛南山遊因而盡原隰數朝至林嶺百仞登鬼爰石

壯馬徑窮苔色步緣入物奇春狀改氣遠天香集虛洞
策杖鳴低雲拂衣濕倚巖見廬舍入戶欣拜揖問性矜
勤勞示心教澄習玉英時共飲芝草為余拾境絕人不
行潭深鳥空立一乘從此受九轉魚是給辭處若輕飛
慙來唯吐吸閒襟超已勝迴路倏而及烟色松上深水
流山下急漸平逢車騎向晚晚城邑峯在野趣繁塵飄
宦情緝辛苦久為吏勞生何妄執日暮還此山悠然賦
斯什

終南山望餘雪作

祖詠

終南陰嶺秀積雪浮雲端林表明霽色城中增暮寒

桃源行

劉禹錫

漁舟何招招浮在武陵水
拖綸擲餌信流去誤入花源
行數里清源尋盡花縣縣
踏花覓徑至洞前洞門蒼暗
烟霧生暗行數步逢虛明
俗人毛骨驚仙子爭來致詞
何至此須臾皆破冰雪顏
笑言委曲問世間因嗟隱身
來種玉不知人世如風燭
筵羞石髓勸客飡燈藝松脂

留客宿雞聲犬聲遙相聞曉光蔥龍開五雲漁人振衣
起出戶滿庭無路花紛紛翻然恐失鄉縣處一息不肯
桃源住桃源滿溪水似鏡塵心如垢洗不去仙家一出
尋無蹤至今流水山重重

桃源行

時年十九

王維

漁舟逐水愛山春兩岸桃花夾古津坐看紅樹不知遠
行盡清溪忽值人山口潛行始隈隩山開曠望旋平陸
遙看一處攢雲樹近入千家散花竹樵客初傳漢姓名

居人未改秦衣服居人共住武陵源還從物外起田園
月明松下房櫳靜日出雲中雞犬喧驚聞俗客爭來集
競引還家問都邑平明閭巷掃花開薄暮漁樵乘水入
初因避地去人間及至成仙去不還峽裏誰知有人事
世中遙望空雲山不疑雲境難聞見塵心未盡思鄉縣
出洞無論隔山水辭家終擬長遊行自謂經過舊不迷
安知峯壑今來變當時只記入山林青溪幾度到雲林
春來遍是桃花水不辨仙源何處尋

和登會稽山

孫逖

稽山碧湖上勢入東溟盡烟景畫清明九峯爭隱嶙望
中厭朱紱俗內採玄北野老聽鳴騶山童擁行軫仙花
寒未落古蔓柔堪引竹澗入霜多松崖向天近雲從海
人去日就江村隕能賦丘嘗聞和歌參不敏宜搜信冲
漠多士期標準願奉濯纓心長謠反招隱

洪州西山祈雨是日輒應賦詩言事

張九齡

茲山蘊靈異走望良有歸丘傳雖已久忙心難重違遲
明申藻薦先夕旅巖扉獨宿雲峯下蕭條人吏稀我來
不我適幽抱自中微靜入風泉奏涼生松栝圍窮年滯
遠想寸晷閱清暉虛美悵無屬素情緘所依詭隨嫵弱
操羈束謝貞肥義濟亦吾道誠存為物祈

贈答弘農青巖曲有盤石可坐宋十一每拂拭待

余寄詩贈之云

田遊巖

信彼稱靈石居然狎遁棲徘徊承翠巘斌駁帶深溪夕

陰起層岫清景半虹蜺風來應嘯阮波渡可琴嵇僕之
潁陽客望彼空思齊儻見山人至簪蒿且杖藜

敬答田徵君

宋之問

家臨清溪水溪水繞盤石綠蘿四面垂裊裊百餘尺風
泉度絲管苔蘇鋪茵席傳聞潁陽人霞外漱靈液忽枉
巖中翰吟卧朝復夕何當遂遠遊物色候逋客

龍門八詠

劉長卿

闕口

秋山向搖落秋水急波瀾獨見魚龍氣長令烟雨寒誰
窮造化力空向兩崖看

水西渡

伊水搖鏡光纖鱗如不隔千龕道傍古一鳥沙上白何
事還山雲能留向城客

水東渡

山葉傍崖赤千峯秋色多夜泉發清響寒渚生微波稍
見沙月上歸人爭渡河

福公塔

寂寞對伊水經行長未還東流自朝暮千載空雲山誰
見白鷗鳥無心洲渚間

遠公龕

松路向精舍花龕歸老僧閒雲揚錫杖落日低金繩入
夜翠微裏千峯明一燈

石樓

隱隱見花閣隔河映青林水田秋鴈下山寺夜鐘聲寂

冥羣動息風泉清道心

渡水

日暮下山來千山暮鐘發不如波上棹還弄山中月伊
水連白雲東南遠明滅

下山

誰識往來意孤雲長自閒風寒未渡水日暮更看山木
落衆峯出龍宮蒼翠間

宣城清溪二首

李白

清溪清我心水色異諸水借問新安江見底何如此人
行明鏡中鳥度屏風裏向曉猩猩啼空悲遠遊子

清溪勝桐廬水木有佳色山貌石高古石容天傾側綵
鳥昔未名白猿初相識不見同懷人對之空嘆息

入崖口五渡寄李適

宋之問

抱琴登絕壑棧木泝清川路極意謂盡勢迴趣轉繇人
遠草木秀山深雲景鮮余負海岳情自昔微尚然彌曠
十餘載今來宛仍全未窺仙源極獨進野人舩時攀乳

竇慙屢薄天
窻眠夜絃響
松月朝櫟弄
苔泉因冥象
外理永謝區
中緣碧潭可
遺老丹砂堪
學仙莫使馳
光暮空令歸
鶴憐

答宋十一崖口五渡見贈

李適

聞君訪遠山
躋險造幽絕
眇然青雲境
觀奇彌年月
登嶺亦沂谿
孤州事沁越
寧嶂傳彩翠
崖磴互欹缺
石林上攢叢
金澗下明滅
捫壁窺丹井
梯苔瞰乳穴
忽枉巖中贈
對翫未嘗輟
殷勤獨往事
委曲鍊藥說
邀余名山

期從爾泛海滙歲晏東宿心斯言非徒設

和崖口五渡

徐彥伯

聞有獨往客拂衣捐世心結忻薄枉渚撰念繁舊林經
亘去崖合冥縣歸壑深琪樹環碧彩金潭生翠陰洄沔
弄沙榜詭仄眺明岑夕聞桂裏猿曉翫松上禽雜佩蘊
孤袖瓊敷綴雙衿我懷滄洲想懿爾白雲吟秉願理方
叶存期跡易尋茲言庶不負為報巖中琴

初至崖口

宋之問

崖口衆山斷，巖峯聳天壁。氣衝落日紅，影入春潭碧。錦
繡織苔蘚，丹青畫松石。水禽泛容與，巖花飛的皪。微路
從此深，我來限于役。惆悵情未已，羣峯暗將夕。

山中作

顧况

野人愛向山中宿，汎在葛洪丹井西。庭前有箇長松樹，
夜半子規來上啼。

輞口遇雨憶終南山

裴迪

積雨晦空曲，平沙滅浮彩。輞水去悠悠，南山復何在。

答裴迪

王維

淼淼寒流廣蒼蒼秋雨晦君問終南山心向白雲外

出青門往南山下別業

薛據

舊業在南山夙駕自城闕榛莽相蔽虧去爾漸超忽散
漫餘雪晴蒼茫季冬月寒風吹長林白日原上沒懷抱
曠早申相知阻胡越弱年好棲隱鍊藥在巖窟及此離
垢氛興來亦因物末路期赤松斯言庶不伐

夜歸鹿門歌

孟浩然

山寺鳴鐘晝已昏
魚梁渡頭爭渡喧
人隨沙道向江村
予亦乘舟歸鹿門
鹿門烟月照中樹
忽到龐公棲隱處
巖扉松徑長寂寥
唯有幽人自來去

春泛若耶

綦母潛

幽意無斷絕
此去隨所偶
晚風吹行舟
花路入谿口
際夜轉西壑
隔山望南斗
潭烟飛溶溶
林月低向後
生事且彌漫
願為持竿叟

荆山獨往

姚係

宿昔山水上抱琴聊躑躅山遠去難窮琴瑟多斷續
重丹陽樹泉咽聞陰谷時下白雲中滄留秋水曲秋水
石攔深潺湲如噴玉雜芳被陰岸墜露方消綠恣此平
生懷獨遊還自足

歸四明

胡幽貞

海色連四明仙舟去容易天籍豈輒問不是早朝士

尋西山隱者不遇

丘為

絕頂一茅茨直上三十里扣關無僮僕窺室唯按几若

非巾柴車應是釣秋水差池不相見
餽俛空仰止草色新雨中松聲晚
窻裏及茲契幽絕自足盪心耳雖無
賓主意頗得清淨理興盡方下山何
必待之子

唐文粹卷十六上

欽定四庫全書

唐文粹卷十六下

宋 姚鉉 編

詩癸 總四十四首

古調歌篇六

幽居十二

百丈谿讀書 閻防

家叔徵君東谿草堂二首 盧象

寒食陸渾別業

宋之問

題東谿公幽居

李白

宿裴有書齋

李觀

酬暉上人夏日林泉見贈

陳子昂

贈宣州元處士

杜牧

東谿翫月

王昌齡

太白東谿張老舍郎事寄舍弟姪等

岑參

長安秋夕

戎昱

貽池陽谷口元贊善

李端

山居十三

宿裴氏山莊

王昌齡

山中作

沈千運

入山寄城中故人

王維

獨遊

王昌齡

過張邯鄲莊

姚合

宿王昌齡隱居

常建

訪陸羽處士

釋皎然

初春

王績

南兗謝郡客留贈宇文中丞

暢當

村居

沈亞之

贈劉藍田

王維

退居

孟郊

渭川田家

王維

傷嘆十九

秦中吟十首

白居易

憫農

李紳

石壕吏

杜甫

辛苦吟

于濬

田家詞

元稹

傷田家

聶夷中

採玉行

韋應物

茶山作

袁高

野老歌

張籍

野行

姚合

百丈谿新理茅茨讀書

閻防

浪迹棄人世還山自幽獨始傍巢由蹤吾其獲心曲荒
庭何所有老樹半空腹秋蜩鳴北林暮鳥穿我屋栖遲
樂遵渚恬曠寡所欲開卦推盈虛散帙攻節目養閒度
人事逢命知止足不學東國儒俟時勞伐輻

家叔微君東谿草堂二首

盧象

關山十餘里青壁森相倚欲識堯時天東谿白雲是雷
聲轉幽壑雲氣香流水澗影生蟲蛇巖端翳杞梓大道
終不易君恩曷能已鶴羨無老時龜言攝生理浮年笑
六甲元化潛一指未暇掃雲梯空慙阮家子

今朝共遊者得性閒未歸已到仙人家莫驚鷗鳥飛水
深巖公釣松挂巢父衣雲氣轉幽寂谿流無是非名理
未足羨腥臊詎所稀自惟負貞意何歲當食薇

寒食陸渾別業

宋之問

洛陽城裏花如雪陸渾山中今始發
旦別河橋楊柳風
夕卧伊川桃李月伊川桃李正芳新
寒食山中酒復春
野老不知堯舜力酣歌一曲太平人

題東谿公幽居

李白

杜陵賢人清且廉東谿卜築歲將淹
宅近青山同謝朓
門垂碧柳似陶潛好鳥迎春歌後院
飛花送酒舞前簷
客到但知留一醉盤中祇有水精鹽

宿裴有書齋

李觀

卧君山窻下山鳥與我言清風何颼颼松柏中夜繁久
遊失歸趣宿此似故園林烟橫近郊谿月落古原稚子
不待曉花間出柴門

酬暉上人夏日林泉見贈

陳子昂

聞道白雲居窈窕青蓮宇巖泉萬丈流樹石千年古林
卧對軒窻山陰滿庭户方釋塵勞事從君襲蘭杜

贈宣州元處士

杜牧

陵陽北郭隱身世兩忘者蓬蒿三畝居寬於一天下鐫

酒對不酌默與玄相話人生自不足愛嘆遭逢寡

東谿玩月

王昌齡

月從斷山口遙吐柴門端萬木紛空霽流陰中夜攢光
連虛象白氣與風露寒谷靜秋泉響巖深青靄殘澄清
入幽夢影破抱空巒恍忽琴窻裏松谿曉思難

太白東谿張老舍即事寄弟姪等

岑參

渭上秋雨過北風暮騷騷天晴諸山出太白峯最高主

人來谿老兩耳生長毫遠近知百歲子孫皆二毛中庭
井欄上一架獼猴桃石泉飯香秔酒瓮開新糟愛茲田
中趣始悟世上勞我行有勝事書此寄爾曹

長安秋夕

戎昱

八月更漏長愁人起常早閉門寂無事滿地生秋草昨
霄西窗夢先入荆門道遠客歸去來在家貧亦好

貽池陽谷口元贊善

李端

入谷逢君來秋泉已難涉林間人獨坐月下山相接重

露濕蒼苔明燈照黃葉故交一不見素髮何稠疊

宿裴氏山莊

王昌齡

蒼蒼竹林暮吾亦知所投靜坐山齋月清谿聞遠流西
峯下微雨向晚白雲收遂解塵中組終南春可遊

山中作

沈千運

棲隱別無事所願早離塵不辭城邑遊禮樂拘束人邇
來歸山林庶事皆吾身何者為形骸誰是智與仁寂寞
了閒事然後知天真咳唾驚榮華迂俯相屈伸如何巢

與由天子不得臣

入山寄城中故人

王維

中歲頗好道晚家南山垂興來每獨往勝事空自知行
到水窮處坐看雲起時偶然值林叟談笑無迴期

獨遊

王昌齡

林卧情自閒獨遊景常晏時從灞陵下隨釣往南澗手
攜雙鯉魚目送千里鴈悟彼飛有適知此羅憂患放之
清泠泉因得省踈慢永懷青岑客迴首白雲間超然物

無違豈繫名與官

過張邯鄲莊

姚合

客行長似病煩熱攻四肢到君讀書堂忽若逢良醫堂
前水交流堂下樹交枝雨門延風涼洗我昏濁肌與子
還往熟行坐恣所宜時時相獻酬文字當酒卮野飯具
藜藿永日亦不飢苟餐非其所鱸炙為羨藜時清士人
閒耕者唯文詞豈獨鄉里薦當取四海知

宿王昌齡隱居

常建

青溪深不測，隱處唯孤雲。
松際露微月，清光猶為君。
茅亭宿花影，藥院滋苔紋。
余亦謝時去，西山鸞鶴羣。

訪陸羽處士

釋皎然

太湖東西路，吳王古山前。
所思不可見，歸鴈自翩翩。
何山賞春茗，何處弄清泉。
莫是滄浪子，悠悠一釣船。

初春

王績

前旦出國遊，林華都未有。
今朝下堂望，池水開已久。
雪避南軒梅，風催北庭柳。
遙呼竈前妾，却報機中婦。
年光

恰恰來滿甕營春酒

南充謝郡客遊澧州留贈宇文丞

暢當

僕本濩落人辱當州郡使量力頗及早謝歸今即已蕭蕭若凌虛衿帶頓銷靡車服率然來涪陽作遊子鬱鬱寡開顏默默獨行李忽逢平生友一笑方在此秋情寧風日楚思浩雲水為語弋林者冥冥鴻遠矣

村居

沈亞之

無樹巢宿鳥無酒共客醉月上蟬韻殘梧桐陰繞地獨
出村舍門吟劇微風起蕭蕭蘆荻叢叫嘯如山鬼應緣
我憔悴為我哭秋思

贈劉藍田

王維

籬間犬迎吠出屋候荆扉歲晏輸井稅山村人夜歸晚
田始家熟餘布成我衣詎肯無公事煩君問是非

退居

孟郊

退身何食可敗力不得閒種稻耕白水負薪斫青山衆

聽喜已唱獨醒愁楚顏日暮靜歸時幽幽叩松關

渭川田家

王維

斜光照墟落深巷牛羊歸野老念牧童倚杖候荆扉
雝雝麥苗秀蠶眠桑葉稀田夫荷鋤至相見語依依
羨此良閒逸悵然歌式微

秦中吟十首

并序

白居易

貞元元和之際予在長安聞見之間有足悲者因直歌
其事命為秦中吟

議婚

天下無正聲悅耳即為娛人間無正色悅目即為姝聲
色非相遠貧富則有殊貧為時所棄富為時所趨紅樓
富家女金縷繡羅襦見人不斂手嬌癡二八初母兄未
開口已嫁不須臾綠窻貧家女寂寞二十餘荆釵不直
錢衣上無真珠幾回人欲聘臨日又踟躕主人曾良媒
置酒滿玉壺四座且勿飲聽我歌兩途富家女易嫁嫁
早輕其夫貧家女難嫁嫁晚孝於姑聞君欲娶婦娶婦

意何如

重賦

厚地植桑麻所要濟生民生民理布帛所求活一身身
外充征賦上以奉君親國家定兩稅本意在憂人厥初
防其淫明勅内外臣稅外加一物皆以枉法論奈何歲
月久貪吏得因循浚我以求寵斂索無冬春織絹未成
足繰絲未盈斤里胥迫我納不許暫逡巡歲暮天地閉
陰風生破村夜深烟火滅霰雪落紛紛幼者形不蔽老

者體無溫悲喘與寒氣併入鼻頭辛昨日輸殘稅因窺
官庫門繒帛如山積絲絮似雲屯號為羨餘物隨日獻
至尊奪我身上暖買爾眼前恩進入瓊林庫歲久化為
塵

傷宅

誰家起甲第朱門大道邊豐屋中櫛比高墉外迴環
累六七堂棟宇相勾連一堂費百萬鬱鬱起青烟洞房
溫且清寒暑不能干高堂虛且迥坐卧見南山繞廊紫

藤架夾砌紅藥欄攀枝摘櫻桃帶花移牡丹主人此中
坐十載為大官厨有臭敗肉庫有朽貫錢誰能將我語
問爾骨肉間豈無貧賤者忍不救饑寒如何奉一身直
欲保千年不見馬家宅今作奉誠園

傷友

陋巷孤寒士出門苦恓恓雖云志氣在豈免顏色低平
生同門友通籍在金閨曩昔膠漆契邇來雲雨睽正逢
下朝歸軒騎五門西是時天久陰三日雨淒淒蹇驢避

路立肥馬當風嘶迴頭忘相識
占道上沙堤昔年洛陽
社貧賤相提携今日長安道
對面隔雲泥近日多如此
非君獨慘悽死生不變者
唯聞任與黎

任公達
黎逢

不致仕

七十而致仕禮法有明文何乃貪榮者
斯言如不聞可憐八九十齒墮雙眸
昏朝露貪名利夕陽憂子孫挂冠
顧翠綏懸車惜朱輪金章腰不勝
偃偻入公門誰不愛富貴誰不戀
君恩年高須告老名遂合退身
少時共嗤

誚晚歲多因循賢者漢二疏彼獨是何人寂寞東門路
無人繼去塵

立碑

勲德既下哀文章亦陵夷但見山中石刻作路傍碑銘
勲悉太公叙德皆仲尼復以多為貴千言直萬賢為文
彼何人想見下筆時但欲愚者悅不思賢者嗤豈獨賢
者嗤仍傳後代疑古石蒼苔字安知是愧辭我聞望江
縣麴令撫惇嫠

麴令名
信陵

在官有仁政名不聞京師身歿

欲歸葬百姓遮路岐攀轅不得去留葬此江湄至今道
其名男女涕皆垂無人立碑碣唯有邑人知

輕肥

意氣驕滿路鞍馬光照塵借問何為者人稱是內臣朱
紱皆大夫紫綬或將軍誇赴軍中晏走馬去如雲罇罍
溢九醞水陸羅八珍果擘洞庭橘鱠切天池鱗食飽色
自若酒酣氣益振是歲江南旱衢州人食人

五絃

清歌且罷唱紅袂亦停舞趙叟抱五絃宛轉當眉撫大
聲粗音麤若散颯颯風和雨小聲細欲絕切切鬼神語又
如鶴報喜轉作啼猿苦十指無定音顛倒宮徵羽坐客
聞此聲形神若無主行客聞此聲駐足不能舉嗟嗟俗
人耳好今不好古所以北窻琴日日生塵上

歌舞

秦城歲云暮大雪滿皇州雪中朝退者朱紫盡公侯貴
有風雲興富無饑寒憂所營唯第宅所務在追遊朱輪

車馬客紅燭歌舞樓懽酣促密坐醉暖脫重裘秋官為
主人迂尉居上頭日中一為樂夜半不能休豈知閬鄉
獄中有凍死囚

買花

帝城春欲暮諠諠車馬度共道牡丹時相隨買花去貴
賤無常價酬直看花數灼灼十朶紅粼粼五束素上張
幙屋底旁織笆籬護水灑復泥封移來色如故家家習
為俗人人迷不悟有一田舍翁偶來買花處低頭獨長

嘆此嘆無人諭一叢深色花十戶中人賦

憫農二首

李紳

春種一粒粟秋收萬顆子四海無閒田農夫猶餓死
鋤禾日當午汗滴禾下土誰知盤中飧粒粒皆辛苦

石壕吏

杜甫

暮投石壕村有吏夜捉人老翁踰牆走老婦出門首吏
呼一何怒婦啼一何苦聽婦前致詞三男鄴城戍一男
附書至二男新戰死在者且偷生死者長已矣室中更

無人所有乳下孫孫有母未去出入無完裙老嫗力雖
哀請從吏夜歸急應河陽役猶得備晨炊夜久語聲絕
如聞泣幽咽天明登前途獨與老翁別

辛苦吟

于漬

壠上扶犁兒手種腹長飢窻下擲梭女手織身無衣我
願燕趙妹化為嫫母姿一笑不直錢自然家國肥

田家詞

元稹

牛吒吒

許角反

田确确旱塊敲牛啼趵趵

音剝

種得官倉珠

穎穀六十年來兵簇簇月月倉糧車輓輓一日官軍收
海服驅牛駕車食牛肉歸來收得牛兩角重鑄鋤犂作
斤斲姑舂婦擔輸促促輸官不足歸賣屋農死有兒牛
有犢不遣官軍糧不足

傷田家

聶夷中

二月賣新絲五月糶秋穀醫得眼前瘡剗却心頭肉我
願君王心化作光明燭不照綺羅筵偏照逃亡屋

采玉行

韋應物

官府徵白丁言采藍溪玉絕嶺夜無人深榛雨中宿獨
婦餉糧還哀哀舍南哭

茶山作

袁高

禹貢道遠俗所圖在安人后王失其本職吏不敢承亦
有姦佞者因茲欲求伸動生千金費日使萬姓貧我來顧
渚源得與茶事親忙輟耕農米採採實苦辛一夫且當
役盡室皆同臻捫葛上欹壁蓬頭入荒榛終朝不盈掬
手足皆皴鱗悲嗟遍空山草木為不春陰嶺芽未吐使

者牒已頻心爭造化力先走挺塵均選納無晝夜擣聲
昏繼晨衆工何枯槁俯視彌傷神皇帝尚巡狩東郊路
多堙周迴繞天涯所獻逾艱勤况減兵革困量茲固疲
民未知供御餘誰合分此珍顧省忝邦守又慙復因循
茫茫滄海間丹憤何由申

野老歌

張籍

老翁家貧在山住耕種山田三四畝苗疎稅多不得實
輸入官倉化為土歲暮鋤犁傍空室呼見登山收橡食

西江賈客珠百斛船中養犬長食肉

野行

姚合

客行野田間比屋皆閉戶借問屋中人盡去作商賈官
家不稅商稅農服作苦居人競東西道路侵墮畝採玉
上山巔探珠入水府邊兵索衣食此物同泥土古來一
人耕三人食猶飢如今千萬家無一把鋤犁我倉常空
虛我田生蒺藜上天不雨粟何由活蒸黎



唐文粹卷十六下

欽定四庫全書

集部

唐文粹卷十七上

下

詳校官庶吉士

臣謝恭銘

助教臣常循覆勘

總校官檢討臣何思鈞

校對官編修臣盧遜

謄錄監生臣陶鳴珂

欽定四庫全書

唐文粹卷十七上

宋 姚鉉 編

詩十一 總五十九首

古調歌篇七

寺觀十一

始除尚書郎別善福精舍 韋應物

寄閻防 劉昫

題鶴林寺

薛據

題破山寺後禪院

常建

琅邪山寺

韋應物

簡寂觀西澗瀑布下作

五老峯贈隱者

姚係

石門墨山有禪堂道觀天下絕境

張說

題思禪寺

獨孤及

仙遊寺有龍潭穴弄玉祠

李華

遊棲霞寺

顧況

廟杜四

四皓廟

元稹

魚山神女歌詞二首

王維

古杜

元稹

邊塞三

虜患

張陵

代北州老翁答

張謂

遼西

崔顥

畫圖六

王處士草堂壁畫衡霍諸山

劉長卿

題劉相公三湘圖

郎士元

觀于舍人壁畫山水

王季友

題邈上人古松歌

朱灣

畫竹歌

白居易

觀李湊所畫美人障子

劉長卿

古器物五

石鼓歌

韓愈

古劍歌

郭元振

磨鏡篇

劉禹錫

贈友人古鏡

朱晝

團扇歌

劉禹錫

樂器七

彈琴

劉希戩

江上琴興

常建

聽蜀僧彈琴

李白

奉和張舍人閣中直夜思聞雅琴因書事

呂溫

聽彈風入松贈楊補闕

王昌齡

金陵聽韓侍御吹笛

李白

武昌老人說笛歌

劉禹錫

草木十一

題老張松樹

宋之問

古栢行

杜甫

修竹篇

陳子昂

種竹

元稹

竹徑偶作

權德輿

露青竹鞭歌

顧況

暑日題道邊樹

王穀

井上桐

陸龜蒙

石上藤

岑參

兔絲

元稹

春草謠

顧況

禽鳥昆蟲十

王兵馬使二角鷹

杜甫

觀放白鷹

李白

飛鳶操

劉禹錫

百舌吟

鸚鵡詞

蘇郁

駕鵞篇

陳子昂

子規啼

韋應物

鷓鴣吟

劉禹錫

春蟬

元稹

江上蛟子

韋楚老

道路二

戲題關門

岑參

門前路

陸龜蒙

始除尚書郎別善福精舍

韋應物

簡略非世器委身同草木逍遙精舍君飲水自為足累
日曾一櫛對書常懶讀社臘會高年山水恣遊矚明世
方選士中朝懸美祿除書忽到門冠帶便拘束愧忝郎
署迹謬蒙君子錄俯仰垂華纓飄飄翔輕轂行將親愛
別戀此西澗曲遠峯照夕川夏雨生衆綠迅風飄野路
迴首不遑宿明晨下烟闕白雲在幽谷

寄閻防

時在終南山豐德寺讀書

劉春虛

青嶂南山色。君與縉錫隣。深路入古寺。落花隨暮春。紛對寂寥往。往往落衣巾。松色空照水。輕聲時有人。晚心復南望。山遠情獨親。應以脩往業。亦唯此立身。深林度空夜。烟月資清真。莫嘆文明日。彌年從隱淪。

題鶴林寺

薛據

道門隱形聲。向背臨法橋。松覆山殿冷。花藏溪路遙。珊瑚寶幡挂。皦皦明燈燒。遲日半空谷。春風連上朝。少憑水木興。暫忝身心調。願謝携手客。茲山禪侶饒。

題破山寺後禪院

常建

清晨入古寺，初日照高林。
竹徑通幽處，禪房花木深。
山光悅鳥性，潭影空人心。
萬籟此都寂，但餘鍾磬音。

琅邪山寺

受命恤人隱，茲遊久未忘。
鳴騶響幽澗，前旌耀崇岡。
青冥臺砌寒，綠縹草木香。
填壑濟花界，疊石構雲房。
經制隨巖轉，繚繞豈定方。
新泉洩陰壁，高蘿蔭綠塘。
攀林一棲心，飲水得清涼。
還歸坐郡閣，但見山蒼蒼。

簡寂觀西澗瀑布下作

淙流絕壁散虛烟翠澗深巖際松風起飄飄灑塵襟窺
蘿玩猿鳥解組傲園林茶菓邀真侶觴酌洽同心曠歲
懷茲賞春行始重尋聊將橫吹笛一寫山水音

五老峯太明觀贈隱者

姚 係

雲觀此山北與君携手稀林端涉橫水洞口入斜暉乍
覺鸞鶴邇忽為烟霧飛故人清和客默會琴心微丹術
幸可授青龍當未歸悠悠平生意此日復相會

一 石門墨山二山相連有禪堂道觀天下絕境

張說

蘭輪江上山近在華容縣常陟巴丘首天晴遙可見佳
遊屢前諾芳月愆幽眷及此符守移懼言臨道便既携
賞心客復有送行掾竹徑入陰窅松崖上空舊草共林
一色雲與峯萬變探窺石門斷緣越沙澗轉兩山勢爭
雄峯巘相顧眄藥妙靈仙寶境華巖壑選清都西淵絕
金地東敞宴池果接園畦風烟邇臺殿高尋去石頂曠

覽天宇偏千山紛滿目百川豁對面騎來雲風迎人去
鳥聲戀長揖桃源士舉世同企羨

題思禪寺上方

溪口聞法鼓停撓登翠屏攀雲到金界合掌開禪扃鬱
律衆山抱空濛花雨零老僧指香樓云是不死亭眇眇
千越路茫茫春草青遠山噴百谷繚繞馳東溟目極想
何在境照心亦冥駑然諸根空破結如破瓶下視三界
狹但聞五濁腥山中有良藥吾欲隳天形

仙遊寺有龍潭穴弄玉祠

捨事入樵逕雲水深谷口萬壑移晦明千峯轉前後
巍然龍潭上右勢若奔走開圻秋天光崩騰夏雷吼靈溪
自茲去紆直互紛聞聽聲靜復喧望色無更有冥冥翠
微下高殿映杉柳滴滴洞穴中懸泉響相扣昔時秦王
女羽化年代久日暮松風來簫聲生左右早窺神仙錄
願結芝朮友安得羨門方青囊繫吾肘

遊棲霞寺

顧況

棲霞山中子規鳥口邊血出啼不了山僧後夜初入定聞
似不聞山月曉

四皓廟

元稹

巢由昔避世堯舜不得臣伊呂雖急病湯武乃可君四賢
胡為者千載名氛氲顯晦有遺跡前後疑不倫秦政虐天
下黷武窮生民諸侯戰心死壯士眉亦顰張良韓儒子椎
碎屬車輪遂令英雄意日夜思報秦先生相將去不復嬰
世塵雲卷在孤岫龍潛為小鱗秦王轉無道諫者鼎鑊新

茅焦脫衣諫先生無一言趙高殺二世先生如不聞劉項
取天下先生遊白雲海內八年戰先生全一身漢業日已
定先生名亦振不得為濟世宜哉為隱淪如何一朝起屈
作儲貳賓安存孝惠帝摧頓戚夫人捨大以謀細虬盤而
螭伸惠皇竟不嗣呂氏禍有因雖懷安劉志未若周與陳
皆落子房術先生道何屯出處貴明白故吾今有云

魚山神女歌詞二首

王維

迎神

坎坎擊鼓魚山之下吹洞簫望極浦女巫進紛屢舞陳
瑤席湛清醑風淒淒兮夜雨神之來兮不來使我心兮
苦復苦

送神

紛進拜兮堂前目眷眷兮瓊筵來不語兮意不傳作暮
雨兮愁空山悲急管思繁絃靈之駕兮儼欲旋倏雲收
兮雨歇山青青兮水潺潺

古社

元稹

古社基趾在人散社不神唯有空心樹妖狐藏魅人狐
惑意顛倒臊腥不復聞丘墳變城郭花草仍荆榛良田
千萬頃占作天荒田主人議芟斫怪見不敢前那言空
山燒夜隨風馬奔飛聲鼓輦震高焰旗幟翻逡巡荆棘
盡狐兔無子孫狐死魅人醒烟消壇墠存繞壇舊田地
給授有等倫農收村落盛社樹新團圓社公千萬歲永
保村中民

虜患

張陵

今日漢家探使回
蟻疊胡兵來未歇
春風渭水不敢流
總作六軍心上血

代北州老翁答

張謂

負新老翁住北州
北望鄉關生客愁
自言老翁有三子
兩人已向黃沙死
如今小男新長成
明年聞道更徵兵
定知此別必零落
不及相隨同死生
盡將田宅借鄰伍
且復伶俜去鄉土
在生本求多子孫
及有誰知更辛苦
近傳天子尊武臣
強兵直欲靜胡塵
安邊自合有長策

何必流離中國人

遼西

崔顥

燕郊芳歲晚殘雪凍邊城四月春草合遼陽春水生胡
人正牧馬漢將日徵兵露重寶刀濕沙虛金鼓鳴寒衣
著已盡春服與誰成寄語洛陽使為傳邊塞情

王處士草堂壁畫衡霍諸山

劉長卿

愛此衡霍近卷簾如何攀能令堂上客見盡湘南山青
翠千萬狀飛來方丈間歸雲無處滅去鳥何時還勝事

日相對主人常獨閑
清陰滿四壁佳氣生重闌
頗與宿心會看看慰愁煩

題劉相公三湘圖

郎士元

昔別醉衡霍邇來憶南州
今朝平津邸魚得瀟湘遊
稍辨荆門樹依然芳杜州
微明三巴峽咫尺萬里流
飛鳥不知倦遠帆生暮愁
潯陽指天末北渚空悠悠
枕上見漁父座中常狎鷗
誰言魏闕下自有東山幽

觀于舍人壁畫山水

王季友

野人宿在人家少朝見此山謂山曉半壁仍棲嶺上雲
開簾放出湖中鳥獨坐長松是阿誰再三招手起來遲
于公大笑向予說小弟丹青能爾為

題遐上人院壁畫古松歌

朱灣

石上盤古根謂言天生朽安知草木性變在畫師手陰
深方丈間真趣幽且閒木文離披勢搓捽中裂空心火
燒出掃成三寸五寸枝便作千年萬年物莓苔濃淡意
不同一半死皮藏蠹蟲風霜未必來到此氣色杳似寒

山中孤標可翫不可取能使支公道場古

畫竹歌

并序

白居易

協律郎蕭悅善畫竹舉世無倫蕭亦甚自秘重有終歲
求其一竿一枝而不得者知予好事忽寫一十五竿惠
然見投予厚其意高其藝無以答貺作歌以報之凡一
百八十六言歌曰

植物之中竹難寫古今雖畫無似者蕭郎下筆獨逼真
丹青已來唯一人人畫竹身尾擁腫蕭畫莖瘦節節竦

人畫竹稍死羸垂蕭畫枝活葉葉動不根而生從意生
不苟而成由筆成野塘水邊碕岸側森森兩叢十五莖
嬋娟不失筠粉態蕭索盡得風烟清舉頭忽見不似畫
低耳靜聽疑有聲西叢七莖勁而健省向天竺寺前石
上見束叢八莖疎且寒憶曾湘妃廟裏雨中看幽姿遠
思少人別與君相顧空長嘆蕭郎蕭郎老可惜手戰眼
昏頭雪色自言便是絕筆時從今此竹猶難得

觀李湊畫美人障子

劉長卿

愛爾含天姿丹青有殊智無間已得象象外更生意西
子不可見千秋無重還空憐浣紗態猶在含臺間一笑
豈易得雙蛾如有情牕風不舉袖但覺羅衣輕華堂翠
幕春風來內閣金屏曙色開此中一見亂人目只疑行
到雲陽臺

石鼓歌

韓愈

張生手持石鼓文勸我試作石鼓歌少陵無人謫仙死
才薄將柰石鼓何周綱陵遲四海沸宣王憤起揮天戈

大開明堂受朝賀諸侯劔珮鳴相磨菟于岐陽騁雄俊
萬里禽獸皆遮蘿鐫功勒成告萬世鑿石作鼓隳嵯峨
從臣才藝咸第一揀選撰刻留山阿雨淋日炙野火燎
鬼物守護煩撓訶公從何處得紙本毫髮盡備無差訛
詞嚴義密讀難晚字體不類隸與蝌年深豈免有畫缺
快劔斫斷生蛟鼉鸞翔鳳翥衆仙下珊瑚碧樹交枝柯
金繩鐵索鎖紐壯古鼎躍水騰龍梭陋儒編詩不收入
二雅褊迫無委蛇孔子西行不到秦倚撫星宿遺羲娥

嗟予好古生苦晚對此涕淚生滂沱憶昔初蒙博士徵
其年始改稱元和故人從軍在右輔為我闕度掘臼科
濯冠沐浴告祭酒如此至寶存豈多氈包席裏可立致
十鼓祇載數駱駝薦諸太湖比部鼎光價豈止百倍過
聖恩若許留大學諸生講解得切磋觀經鴻都尚填咽
坐見舉國來奔波剋苔剔蘚露節角安置妥帖平不頗
大厦深簷與蓋覆經歷久遠期無他中朝大官老於事
闕肯感激徒媿嬰牧童敲火牛礪角誰復著手為摩挲

日消月燦就埋沒六年西顧空吟哦義之俗書趨姿媚
數紙尚可博白鵝繼周八代爭戰罷無人收拾理則那
方今太平日無事柄任儒術崇丘軻安能以此上論列
願借辯口如懸河石鼓之歌止於此嗚呼吾意甚蹉跎

古劍歌

郭元振

君不見昆吾鐵冶飛炎烟紅光紫氣俱赫然良工鍛鍊
凡幾年鑄得寶劍名龍泉龍泉顏色如霜雪良工咨嗟
歎奇絕琉璃玉匣吐蓮花錯鏤金環生明月正逢天下

無風塵幸得周防君子身精光黯黯青蛇色文章片片
綠龜鱗非直結交遊俠子亦曾親近英雄人何言中路
遭棄捐零落飄淪古獄邊雖復沉埋無所用猶能夜夜
氣衝天

磨鏡篇

劉禹錫

流塵翳明鏡歲久看如漆門前負局生為我一磨拂
萍開綠池滿暈盡金波溢白日照空心圓光走幽室山
神祇氣沮野魅真形出却思未磨時瓦礫來唐突

贈友人古鏡

朱晝

我有古時鏡，初自壤陵得。蛟龍猶泥蟠，魑魅幸月蝕。磨久見菱闕，青於監水色。贈君將照心，無使心受惑。

團扇歌

劉禹錫

團扇復團扇，奉君清暑殿。秋風入庭樹，從此不相見。上有乘鸞女，蒼蒼網蟲遍。明月入懷袖，別是機中練。

彈琴

劉希戩

碧山本岑寂，素琴何清幽。彈為風入松，崖谷颯以秋。庭

鶴舞白雪泉魚躍洪流余欲娛世人明月難暗投感嘆
未終曲淚下不可收嗚呼鍾子期零落歸山丘死而若
有知魂兮從我遊

江上琴興

常建

江上調玉琴一絃清一心泠泠七絃遍萬木澄幽陰能
使江月白又令江水深始知梧桐枝可以徵黃金

聽蜀僧濬彈琴

李白

蜀僧抱綠綺西下峨眉峯為我一揮手如聽萬壑松客

心洗流水餘響入霜鍾不覺碧山暮秋雲暗幾重

奉和張舍人閣中直夜思聞雅琴因書事

呂溫

迢遞天上直寂寞丘中琴憶爾山水韻起予仁智心凝
情在正始超踈滌煩襟涼生子夜後月照禁垣深遠風藹
蘭氣微露清桐陰方襲緇衣慶永奉南薰吟

聽彈風入松贈楊補闕

王昌齡

商風入我絃夜竹深有露絃悲與林寂清景不可度寥

落幽居心颺颺青松樹松風吹草白溪水寒日暮聲意
去復還九變待一顧空山多雨雪獨立君始悟

金陵聽韓侍御吹笛

李白

韓公吹玉笛個個流英音風吹繞種山萬壑皆龍吟王
子停鳳管師裏掩瑤琴餘響渡江去天涯安可尋

武昌老人說笛歌

劉禹錫

武昌老人七十餘手把庾令相聞書自言年少學吹笛
早事曹王曾賞激往年征鎮戍蘄州楚山蕭蕭笛竹秋

當時買林恣搜索典却身上烏貂裘古苔蒼蒼封老節
石上孤生飽風雪商聲五音隨指發水中龍應行雲絕
曾將黃鶴樓上吹一聲占盡秋江月如今老去興猶遲
音韻高低耳不知氣力已無心尚在時時一曲夢中吹

題老張松樹

宋之聞

歲晚東巖下周顧何悽惻日落西山陰衆草起寒色中
有喬松樹使我長嘆息百尺無寸枝一生自孤直

古栢行

杜甫

孔明廟前有老栢柯如青銅根如石霜皮溜雨四十圍
黛色參天二千尺君臣已與時際會樹木猶為人愛惜
雲來氣接巫峽長月出寒通雪山白憶昨路遶錦亭東
先主武侯同閔宮崔嵬枝幹郊原古窈窕丹青戶牖空
落落盤踞雖得地冥冥孤高多烈風扶持自是神明力
正直元因造化功大厦如傾要梁棟萬牛迴首丘山重
不露文章世已驚未辭翦伐誰能送苦心豈免容螻蟻
香葉曾經宿鸞鳳志人幽士莫怨嗟古來才大難為用

與東方左史脩竹篇

并序

陳子昂

東方公足下文章道弊五百年矣漢魏風骨晉宋莫傳
然而文獻有可徵者僕嘗暇時觀齊梁間詩彩麗競繁
而興寄都絕每以永嘆竊思古人常恐逶迤頽靡風雅
不作以耿耿也一昨於解三處見明公詠孤桐篇骨氣
端翔音情頓挫光映朗練有金石聲遂用洗心飾視發
揮幽鬱不圖正始之音復覩於茲可使建安作者相視
而笑解君云張茂先何敬祖東方生與其比肩僕亦以

為知言也故感嘆雅製作脩竹詩一篇當有知音以傳示之

龍種生南岳孤翠鬱亭亭峯頂上崇翠烟雨下微冥夜
聞鼃鼠叫晝聒泉壑聲春風正淡蕩白露已清泠哀響
激金奏密色滋玉英歲寒霜雪苦含彩獨青青豈不厭
凝冽羞比春木榮春木有盈歇此節無凋零始願比金
石終古保堅貞不意伶倫子吹之學鳳鳴遂偶雲龢瑟
張樂奏天庭妙品方千變簫韶亦九成信蒙雕斲美常

願事僊靈驅馳翠蚪駕伊鬱紫鸞笙結交羸臺女吟弄
昇天行携手登白日遠遊戲赤城低昂玄鶴舞斷續彩
雲生永隨衆仙去三山遊玉京

種竹并序

元稹

昔樂天贈余詩云無波古井水有節秋竹竿余秋來種
竹廳下因而有懷聊書十韻

昔公憐我直比之秋竹竿秋來苦相憶種竹廳前看失
地顏色改傷根枝葉殘清風猶淅淅高節空團團鳴蟬

聒暮景跳蛙築幽欄塵土復晝夜稍雲良獨難丹丘信
云遠安得臨仙壇沁瘴冬草綠何人驚歲寒可憐亭亭
榦一一青琅玕孤鳳竟不至坐傷時節閑

竹逕偶作

權德輿

退朝此休沐閉戶無塵氛支策入幽逕清風隨此君琴
觴恣偃傲蘭蕙相葢葢幽賞方自適林西烟景曛

露青竹鞭歌

顧况

鮮于仲通正當年章仇兼瓊在蜀川約束蜀兒採馬鞭

蜀兒採鞭不敢眠橫截斜飛飛鳥邊繩橋夜上層崖巔
頭挿白雲跨飛泉採得馬鞭長且堅浮漚丁子珠聯聯
灰煮蠟指光爛然章仇魚瓊持上天上天雨露何其偏
飛龍閑廐馬數千朝飲吳江夕秣燕紅塵撲轡汗濕韉
師子麒麟聊比肩曲江昆明洗刷牽四蹄踏浪頭拚天
蛟龍稽顙河伯虔拓羯胡鵠脚手鮮陳閎韓幹丹青妍
欲貌未貌眼欲穿金鞍玉勒錦連乾騎入桃花楊柳烟
十二樓中奏管絃樓中美人奪神仙爭愛大家把此鞭

祿山入關闢破年忽見楊川北邸前祇有人還千一錢
亭亭筆直無皺節磨將形相一條鐵市頭格是無人別
江海錢臣不拘綆垂鞘挂影西窻缺稚子覓衣闕仰穴
家僮拾薪幾拗折玉潤猶霑玉壘雪碧解似染萇弘血
蜀帝祠邊子規咽相如橋上文君絕往年策馬降至尊
七盤九折橫劒門穆王八駿超崑崙安用冉冉孤生根
聖人不貴難得貨金玉珊瑚誰買恩

暑日題道邊樹

王穀

火輪迸焰燒長空浮埃撲面愁濛濛
嬴僮走馬喘不進忽逢碧樹含清風
清風留我移時住滿地濃陰懶前去
却嘆人無及物功不似團團道邊樹

井上桐

陸龜蒙

美人傷別離汲井常待曉愁因轆轤轉
驚起雙棲鳥獨立傍銀牀碧桐風嫋嫋

石上藤

岑參

石上生孤藤弱蔓依石長不逢高枝引
未得凌空上何

處堪託身為君長萬丈

兔絲

元稹

人生莫依倚依倚事不成君看絲絲蔓依倚榛與荆荆
榛易蒙密百鳥撩亂鳴下有孤兔穴奔走亦縱橫樵童
斫將去柔蔓與之并翳薈生可耻束縛死無名桂樹月
中出珊瑚石上生俊鶻渡海食應龍昇天行靈物本特
達不復相纏縈纏縈竟何者荆棘與飛莖

春草謠

顧况

春草不解行隨人上東城正月二月色綿綿千里萬里
傷人情

王兵馬使二角鷹

杜甫

悲臺蕭颯石龍窅哀闕機杼浩呼洶中有萬里之長江
迴風陷日孤光動角鷹翻倒壯士臂將軍玉帳軒勇氣
二鷹猛腦條徐墜目如愁胡視天地杉雞竹兔不自惜
溪虎野羊俱闕易韞主鋒稜十二翻將軍勇銳與之敵
將軍樹勲起安西崑崙虞泉入馬蹄白羽曾肉三狡獬

敢決豈不與之齊
荆南芮公得將軍
亦如角鷹下翔雲
惡鳥飛飛啄金屋
安得爾輩開其羣
驅逐六合梟鸞分
觀放白鷹

李白

八月邊風高
胡鷹白錦毛
孤飛一片雪
百里見秋毫

飛鳶操

劉禹錫

鳶飛杳杳青雲裏
鳶鳴蕭蕭風四起
旗尾飄揚勢漸高
箭頭鏑劃聲相似
長空悠悠霽日懸
六翮不動凝飛烟
游鷗翔鴈出其下
慶雲清景相迴旋
忽聞饑鳥噪相聚

瞥下雲中爭腐鼠騰音礪吻相喧呼仰天大嚇疑鷄鷄
畏人避犬投高處俛啄無聲猶屢顧青鳥自愛玉山禾
仙禽徒貴華亭露樸檉危巢向暮時陪鰓飽腹蹲枯枝
遊童挾彈一麾肘臆碎羽分人不悲天生衆禽各有類
威鳳文章在仁義鷹隼儀形螻蟻心雖能淚天何足貴

百舌吟

曉星寥落春雲低初聞百舌間闌啼花枝滿空迷處所
搖動繁英墜紅雨笙篁百轉音韻多黃鸝吞聲燕無語

東方朝日遲遲升迎風弄影如自矜散聲不盡又飛去
何許相逢綠楊路繇蠻宛轉似娛人一心百舌何紛紜
醜顏俠少停歌聽墮珥妖姬和睡聞可憐光景何時盡
誰能低迴避鷹隼廷尉張羅自不關潘郎挾彈無情損
天生羽族爾何徵舌端萬變乘春暉南方朱鳥一朝見
索漠無言蒿下飛

鸚鵡詞

蘇郁

莫把金籠閉鸚鵡箇箇分明解人語忽然更向君前語

三十六宮愁幾許

鴛鴦篇

陳子昂

飛飛鴛鴦鳥舉翼相蔽虧俱來淥潭裏共向白雲涯音
容相眷戀羽翮兩逶迤蘋萍戲春渚霜霰遶寒池浦沙
連岸淨汀樹拂潭垂年年此遊翫歲歲來追隨鳳凰起
丹穴獨向梧桐枝鴻鴈來紫塞空憶稻粱肥烏啼倦永
夕鶴鳴傷別離豈若此雙禽飛膳不異林刷尾清江浦
交頸紫山岑文章負奇色和鳴多好音聞有鴛鴦綺復

有鴛鴦衾持為美人贈勗此故交心

子規啼

韋應物

高林滴露夏夜清南山子規啼一聲鄰家嬌婦抱兒泣
我獨展轉何為情

鷓鴣吟

劉禹錫

朝陽有鳴鳳不聞千萬祀鷓鴣催衆芳畏聞先入耳秋
風白露晞從是爾啼時如何上春日唧唧滿庭飛

春蟬

元稹

我自東歸日厭苦春鳩聲作詩憐化工不遣春蟬生及
來商山道山深氣不平春秋兩相似蟲豸百種鳴風松
不成韻蜩蟬沸如羹豈無朝陽鳳羞與微物爭安得天
上雨奔渾河漢傾蕩滌反時氣然後好清明

江上蚊子

韋楚老

搖狹翅亞紅腹江邊夜起如雲哭請問貪婪一點心腐
肉填腹幾多足越女如花住江曲寒城夜夜凝雙綠任
君撩亂錦窻中十幅輕綃圍夜玉

戲題關門

岑參

來亦一布衣去亦一布衣羞見關城吏還從舊路歸

門前路

陸龜蒙

門前向城路一直復一曲曲去日中還直行日暮宿何
必日中還曲塗荊棘間

唐文粹卷十七上

欽定四庫全書

唐文粹卷十七下

宋 姚鉉 編

詩十二 總五十六首

古調歌篇八

月明河四

月生句 劉猛

把酒問月 李白

月蝕詩

盧仝

明河篇

宋之問

風雨露雪六

賀雨詩

白居易

洛陽清明日雨霽

李正封

詠露

山雪

釋皎然

秋風引

劉禹錫

竹牕聞風寄苗發司空曙

李益

江海泉水十

觀海

獨孤及

西陵口觀海

薛據

題玉潭

獨孤及

及第後過楊子江

施肩吾

責漢水詞

李善夷

迎潮送潮詞二首

陸龜蒙

引泉詩

賦得三峽流泉歌 李季蘭

明冰篇 富嘉謨

宮禁七

殿前曲 王昌齡

西施篇 王維

三閤詞四首 劉禹錫

霓裳羽衣曲 李肱

神仙二十九

遊仙詩十六首

道士吳筠

上元夫人詩

李白

王子喬

宋之問

玉真仙人詞

李白

夢太白峯西

常建

苦篁調笑引

李賀

少室山韋鍊師昇仙歌

皇甫冉

宿青牛谷梁鍊師仙居

楊衡

玄都壇歌

杜甫

寄全椒山中道士

韋應物

洗心

道士司馬退之

齋心

王昌齡

寄菖蒲

張籍

金璫玉佩歌

顧況

月生句

劉猛

月生十五前日望光彩圓月滿十五後日畏光彩瘦不見野花色一樽成暗酒匣中苔背銅光短不遍空不惜補明月慙無此良工

把酒問月

故人賈淳令余問之

李白

青天有月來幾時我今停盃一問之人攀明月不可得月行却與人相隨皎如飛鏡臨丹闕綠烟滅盡清輝發但見宵從海上來寧知曉向雲間沒白兔搗藥秋復春姮娥孤棲誰與鄰今人不見古時月今月曾經照古人

古人今人若流水共看明月皆如此
唯願當歌對酒時
月光長照金樽裏

月蝕詩

盧仝

新天子即位五年歲次庚寅斗柄插子律調黃鍾森森
萬木夜殭立寒氣鬩負頑無風爛銀盤從海底出出來
照我草屋東天色紺滑凝不流水光交貫寒瞳矐初疑
白蓮花浮出龍王宮八月十五夜比並不可雙此時怪
事發有物吞食來輪中輪如壯士斧斫壞桂似雪山風

拉推百練鏡照見膽平地理寒灰火龍珠飛出腦却入
蚌蛤胎搥環破壁眼看盡當天一搭如煤焰磨蹤滅跡
須臾間便似萬古不可開不料至神物有此大狼狽星
如撒沙出爭頭事光大奴婢炷燈看揜烏感切茨如玳瑁

今夜吐燄如長虹孔隙千道射戶外玉川子涕泗下中
庭獨自行念此日月者太陰太陽精皇天要識物日月
乃化生走天汲汲勞四體與天作眼行光明此眼不自
保天公行道何由行吾見陰陽家有說望日蝕月月光

滅朔月掩日日光缺兩眼不相攻此說吾不容又孔子
師老子云五色令人目盲吾恐天似人好色則喪明幸
且非春時萬物不嬌榮青山破瓦色淥水冰崢嶸花枯
無女艷鳥死沉歌聲頑冬何所好偏使一目盲又聞古
老說蝕月蝦蟆精徑圓千里入汝腹如此癡騃阿誰生
可從海窟來便解緣清冥恐是睚眦閒措寒所化成黃
帝有二目帝舜重瞳明二帝懸四目四海生光輝吾不
過二帝滉漭不可知何故腫子闕坐使蟲豸欺長嗟白

兔搗靈藥恰似有意防姦非藥成滿闕不中度委任白
兔夫何為憶昔堯為天十日燒九州金礫水銀流玉熠
丹砂焦六合烘為窰堯心增百憂天見堯心憂勃然發
怒決洪流立擬沃殺九日妖天高日走沃不及但見萬
國赤子戢戢生魚頭此時九御導九日爭持節幡麾幢
旒駕車六九五十四頭蛟螭蚪掣電九火輶汝若蝕開
齟齬輪御轡執索相爬鉤推蕩轟渴入汝喉紅鱗蝕鳥
燒口快翎鬣倒側聲酸鄒撐腸拄腹礪礪如山丘自可飽

死更不偷不獨填饑坑亦解堯心憂恨汝時當食埋頭
揪腦不肯食不當食張唇哆嘴食不休食天之眼養逆
命安得上帝請汝劉嗚呼人養虎被虎齧天媚墓被墓
瞎乃知恩非類一一自作孽吾見患眼人必索良工訣
想天不異人愛眼固應一安得常娥氏來習扁鵲術手
操春喉戈去此睛上物初既猶朦朧既久如抹漆但恐
功業成便此不吐出玉川子又涕泗下心禱再拜額榻
沙土中地上蟣虱臣全告訴帝天皇臣心有鐵一寸可

列妖慕癡腸皇天不為臣立梯磴臣血肉身無由飛上
天揚天光封詞付與小心風飈排閭闔入紫宮密邇玉
几前劈折奏上臣全頑愚冒敢死橫干天甚長東方蒼
龍角插戟尾捍風雷心開明堂統領三百六十鱗蟲坐
治東方宮月蝕不救援安用東方龍南方火鳥赤潑血
項長尾短飛跋刺頭戴弁冠高達拊月蝕鳥宮十二度
鳥為居傳主人不覺察貪向何人家行赤口毒舌毒蟲
頭上喫却月不啄殺虛貶鬼眼赤突音狀竈鳥罪不可雪

西方攫虎立倚倚

音几

斧為牙鑿為齒偷犧牲食封豕大

墓一嚮固當軟美見似不見是何道理爪牙根天不念

天天若准擬錯准擬北方寒龜被蛇縛藏頭入殼如入

獄蛇筋束緊束破殼寒龜夏鼈一種味且當臠其肉一

底板沒信處唯堪支牀脚不中鑽灼與天下卜歲星主

福德官爵奉東秦忍使黔婁生覆尸無衣巾天失眠不

弔歲星胡其仁熒惑矍鑠公執法大不中月明無罪過

不糾蝕月蝨年年十月朝太微支盧謫罰何災凶土星

與土性相背反養福德生禍害到人頭上死破敗今夜
月蝕安可會太白真將軍怒激鋒鉞生恒州陣斬酈定
進項骨脆甚春蔓菁天唯兩眼失一眼將軍何處行天
兵辰星任迂尉天律自主持人命在盆底固應樂見天
育時天若不肯信試喚臯陶鬼一問而今三台文章宮
作上天紀綱環天二十八宿磊落尚書郎整頓排五行
劍握他人將一四太陽側一四天市旁操斧伐大匠兩
手不怕傷弧矢引滿反射人天狼呀啄明煌煌癡牛與

駭女不肯勤農桑徒勞含淫思旦夕遙相望蚩尤簸旗
弄旬始槌天鼓鳴璫琅枉矢龍蛇行眉目森森張天狗
下舐地血流何滂滂譎險萬萬黨構架何可當昧目豐
成就害我光明王請留北斗一星相比極指揮萬國懸
中央此外盡拂除沙磧如山岡贖我父母光當時怕星
沒殞雨如抨漿似天會事發叱喝誅姦狂何故中道廢
自遺今日殃善善又惡惡郭公所以亡願天神聖心無
信他人忠玉川子詞訖風色緊格格近月墨暗邊有似

動劒戟須臾癡墓精兩吻自決圻初露半个壁漸吐滿
輪魄衆星盡原赦一蠹獨誅礫腹肚忽脫落依舊挂穹
碧光彩未蘇來慘淡一片白奈何萬里光受此吞吐厄
再得見天眼感荷天地力或問王川子孔子修春秋二
百四十年月蝕盡不收今子吐吐詞頗合孔意不王川
子笑答或請聽逗遛孔子父母魯諱魯不諱周書外書
大惡故月蝕不見收余命唐天口食唐土唐禮過三唐
樂過五小猶不說大不可數災沴無有大小瘡安引哀

周研覈可否日分晝月分夜辨寒暑一主刑一主德政
乃舉孰謂人面上一月偏可去願天完兩日照下萬方
土更不瞽萬萬古

明河篇

宋之問

八月涼風天氣晶萬里無雲河漢明昏見南樓清且淺
曉落西山縱復橫洛陽城闕天中起長河夜夜千門裏
複道連攬共蔽虧畫堂瓊戶特相宜雲母帳前初汎濫
水精簾外轉逶迤倬彼昭回如練白復出東城接南陌

南陌征人去不歸誰家今夜擣寒衣
鴛鴦機上踈螢度
烏鵲橋邊一鴈飛
鴈飛螢度愁難歇
坐見明河漸微沒
已能舒卷任浮雲
不惜光輝讓流月
明河可望不可親
願得乘槎一問津
更將織女支機石
還訪成都賣卜人

賀雨詩

白居易

皇帝嗣寶歷元和三年冬自冬及春莫不雨旱熯熯上
心念下民懼歲成災凶遂下罪己詔殷勤告萬邦帝曰
予一人繼天承祖宗憂勤不遑寧夙夜心中忉忉元年誅

劉關一舉靖巴邛二年戮李錡不戰安江東顧惟眇眇
德遽有巍巍功或者天降沴無乃儆予躬上思答天戒
下思致時雍莫如率其身慈和與儉恭乃命罷進獻乃
命賑饑窮宥死降五刑責已寬三農宮女出宣徽廐馬
減飛龍庶政靡不舉皆出自宸衷奔騰道路人偃偻田
野翁僮呼相告報感泣涕霑胷順人人心悅先天天意
從詔下纔七日和氣生沖融凝為油油雲散作習習風
晝夜三日雨淒淒復濛濛萬心春熙熙百穀青芄芃人

變愁為喜歲易儉為豐乃知王者心憂樂與衆同皇天
及后土所感無不通冠珮何鏘鏘將相及王公蹈舞呼
萬歲列賀明庭中小臣誠愚陋職忝金鑾宮稽首再三
拜一言獻天聰君以明為聖臣以直為忠敢賀有其始
亦願有其終

洛陽清明日雨霽

李正封

曉日清明天夜來
嵩少雨千門尚烟火
九陌無塵土
酒醪河橋春漏閑
宮殿午遊人戀芳草
半犯嚴城鼓

詠露

霏霏靈液重雲表無聲落霑樹急玄蟬灑池淒皓鶴流
塵清遠陌飛月澄高閣宵潤玉堂簾曙寒金井索佳人
比珠淚坐感紅綃薄

山雪

釋皎然

夕陽在西峯疊翠縈殘雪狂風卷絮迴驚猿攀玉折何
意山中人誤報山花發

秋風引

劉禹錫

何處秋風至蕭蕭送鴈羣今朝入庭樹孤客最先聞

竹窻聞風寄苗發司空曙

李益

微風驚暮坐臨牖思悠哉開門復動竹疑是故人來時
滴枝上露稍霑苔下苔幸當一入幌為拂綠琴埃

觀海

獨孤及

北登渤海島回首秦東門誰尸造物功鑿此天池源
瀕洞吞百谷周流無四垠廓然混茫際望見天地根
白日自中吐扶桑如可捫迢迢蓬萊峯想像金臺存
秦帝昔

經此登臨異飛翻揚旌百神會望日羣山奔徐福竟何
成羨門徒空言唯見石橋足千年潮水痕

西陵口觀海

薛據

浙江漫湯湯近海勢彌廣在昔胚混凝融為百川長地
形失端倪天色潛滉漾東南際萬里極目遠無象山影
乍浮沉潮波忽往來孤帆或不見棹歌猶響像日暮長
風起客心空振蕩浦口霞未收潭心月初上林嶼幾遭
迴亭臯時偃仰歲晏訪蓬瀛真遊非外獎

題王潭

獨孤及

碧玉徒強名，冰壺難比德。唯當寂照心，可並滄淪色。

及第後過楊子江

施肩吾

憶昔將貢年，抱愁此江邊。魚龍互閃爍，黑浪高於天。今
日步春草，復來經此道。江神也世情，為我風色好。

責漢水辭

并序

李善夷

春秋僖公四年，齊桓公合諸侯之師，盟于召陵，責楚之
苞茅不入，問昭王南征而不復。楚子使屈完對曰：貢之

不入寡君之罪也敢不供給昭王南征之不復君其問
諸水濱按昭王南征至漢舟人膠其舟王遂溺死杜預
曰當時漢水未屬楚杜之注其為謬哉且楚實殷之始
封楚苦縣濂鄉在漢水東北六百餘里則漢水於西周
之際豈未屬楚乎又詩云撻彼殷武奮伐荆楚深入其
阻裒荆之旅鄭玄注云深入方城之阻也方城今在漢
水北三百里豈昭王時未屬楚乎屈完以齊桓所問之
大不敢他對但請自問於水濱之人言我不之知也漢

實屬楚久矣夫山林川澤天子祀之必有其典楚人膠其舩而禍其君神不能福神之罪也余過漢見其波濤滉瀾而責其水詞曰

漢之廣兮風波四起雖有風波不如蹄涔之水蹄涔之水不為下國而傾天子漢之深兮其隄莫量雖云莫量不如行潦之汪行潦之汪不為下國而溺天王漢之美者曰魴吾雖饑不食其魴恐汚吾之饑腸

迎潮送潮詞二首

并序

陸龜蒙

余耕稼所在松江南旁田廬門外有溝通浦漵而朝夕
之潮至矣天弗雨則輒而留之用以滌濯灌溉及物之
功甚鉅其羸壯遲速繫望晦盈虛也用之則順而進捨
之則默以退有類乎君子之道翫而感之作迎潮送潮
詞二首聊寄聲於騷人之末

江霜嚴兮楓葉丹潮聲高兮墟落寒鷗巢卑兮漁箔短
遠岸沒兮光爛爛潮之德兮無際既充其大兮又充其
細密幽人兮款柴門寂寞流連兮依稀舊痕濡餘澤槁

兮潮之恩不尸其功兮歸于混元

右迎潮

潮西來兮又東下日染中流兮紅灑灑汀葭蒼兮水蓼
枯風騷牢兮愁烟孤大幾望兮微將翳晦搜瀛溶兮斂
然而退愛長波兮數數一幅巾兮無纓可濯帆生塵兮
棹有衣悵潮之還兮吾猶未歸

右送潮

引泉詩

睦州龍興觀老君院作

上嗣位六載吾宗刺桐川余來拜旌戟詔下之明年是
時春三月繞郭花蟬聯嵐盤百萬髻上插黃金鈿授以
道士館置榻于東偏滿院聲碧樹空堂形老仙本性樂
凝淡及來更虛玄焚香禮真像盥手披靈編新安山角
角烏龍獨巉然鳴鑼除非淨晴日不見蒼崖巔上有擎
雲峯下有噴壑泉泉分數十派落處皆崢嶸寒聲入爛
醉眊破西憲眠支筇起獨尋祇在牆東邊呼僮具畚鍤
立鑿莓苔穿濃潦一派墮練帶橫斜牽亂石拋落寒

流響濺濺狂怒七里瀨縮到踈楹前跳光潑半散湧沫
飛旋圓勢束三峽挂瀉危孤磴懸曾聞瑤池溜亦灌朱
草田龜伯弄翠葉鸞鵠無丹烟凌風挾桂拖隔霧馳屏
舩况當玄元家嘗著道德篇上善可比水斯文叅五千
精靈若在此肯惡微波傳不擬爭滴瀝還應會淪漣出
門後飛箭合勢浮青天必有學真子鹿冠秋鶴顏如能
輔余志日使䟽其源

賦得三峽流泉歌

李季蘭

妾家本住巫山雲巫山流水常自聞玉琴奏出轉寥夤
直似當時夢中聽三峽迢迢幾千里一時流入幽閨裏
巨石崩崖指下生飛波遠浪絃中起初疑噴怒含雷風
復似鳴咽流不通迴湍曲瀨意將盡時復滴瀝平沙中
憶昔阮公為此曲能使仲容聽不足一彈既畢還一彈
願比流泉鎮相續

明冰篇

富嘉謨

北陸蒼茫河海凝南山闌干晝夜冰素彩我我明月升

深山窮谷不自見安知採斲備嘉薦陰房固沍掩寒扇
陽春二月朝始暾春光潭施度千門明冰時出御至尊
彤庭赫赫九儀備晉玉煌煌千宮事明冰畢歲周在位
憶昔沙朔寒風漲崑崙長河冰始壯漫汗峻嶒積亭障
邕邕鳴鴈江上來禁苑池臺冰復開搖春涵綠映樓臺
豳歌七月王風始明冰藏用昭物軌四時不忒千萬祀

殿前曲

王昌齡

貴人粧梳殿前催香風吹入殿後來仗引笙歌大宛馬

白蓮花發照池臺

西施篇

王維

豔色天下重西施寧久微朝為越溪女暮作吳宮妃賤
日豈殊衆貴來方悟稀邀人傳香粉不自著羅衣君寵
益嬌態君憐無是非當時浣紗伴莫得同車歸寄謝鄰
家子效顰安可希

三閤詞

吳音四首

劉禹錫

貴人三閤上日晏未梳頭不應有根事嬌甚却成愁

珠箔曲瓊鉤子細見楊州北兵那得渡浪語聲悠悠
沉香帖閣柱金縷畫門楣迴首降幡下已見黍離離
三人出智井一身登檻車朱門謾臨水不得見鱸魚

霓裳羽衣曲

李肱

開元太平日萬國賀豐歲梨園厭舊曲玉座流新製鳳
管遞參差霞衣競搖曳宴罷水殿空輦餘春草細蓬壺
事已久仙樂功無替詎肯聽遺音聖明知善繼

遊仙十六首

道士吳筠

啓冊觀往載，搖懷考今情。終古已寂寂，舉世何營營。
悟彼衆仙妙，超然含至精。凝神契沖玄，化服凌太清。
心同宇宙廣，體合雲霞輕。翔風吹羽蓋，慶霄拂霓旌。
龍駕朝紫微，後天保令名。豈如寰中士，軒冕矜暫榮。

鸞鳳棲瑤林，鸚鵡集平楚。飲啄本殊好，翱翔終異所。
吾方遺諠囂，立節慕高舉。解茲區中戀，結彼霄外侶。
誰謂天路遐，感通自無阻。

愍俗從遷謝，尋仙去淪沒。三元有真人，與我生道骨。
凌

晨吸丹景入夜飲黃月百關彌調暢方寸益清越棲神
合虛無洞覽周恍惚不覺隨玉皇焚香詣金闕

西龜初定錄東華已校名三官無遺譴七祖昇雲輶體
妙塵累隔心微玄化并一朝出天地億載猶童嬰使我
齊浩劫蕭蕭宴玉清

怡神在靈府皎皎含清澄仙經不吾欺輕舉信有徵疇
昔希道念而今果天矜豈非陰功者乃致白日昇焉用
過洞府吾其越朱陵

高真誠寥邈道合不我遺孰謂姑射遠神人可同嬉結
駕從之遊飄飄出天垂不理人自化神疑物無疵因知
至精感足以和四時

八海廣無際三山高不極金臺羅中天羽客恣遊息霞
液朝可飲虹芝晚甚食嘯歌自忘心騰舉寧假翼保壽
同三光安能幾千億

將過太帝宮暫詣扶桑處真童已相迓為我清宿霧滄海
寧洪濤羲和止奔馭五雲結層閣八景動飛輿青霞正

可挹丹砂時一遇留我宴玉堂歸軒不令遽

欲趨洞陽界試覽丹極表赤帝躍火龍炎官控朱鳥導
我昇絳府長驅出天杪陽靈赫重暉四達何皎皎為爾
沅飄風羣生遂無天

予因詣金母飛蓋超西極遂入素中天停輪太濛側若
華拂沅影不使白日匿傾曦復亭午六合無暝色道化
隨感遷此理誰能測

九龍何蜿蜿載我昇雲網臨晚懷舊國風塵混蒼茫依

依遠人寰去去通帝鄉上超星辰紀下視日月光倏已
過太微天居煥煌煌

停驂太儀側整服金闕前肅肅承上帝鏘鏘會羣仙鴻
鑪發靈香廣廡張鈞天玉醴洽中座霞膏充四筵良期
無終極俛仰移億年

峻朗妙門闢澄微真覽通瓊林九霄上金閣三天中飛
蚪躍慶雲翔鶴搏靈風鬱彼玉京會仙期六合同

予昇至陽源欲憇明霞館飄飄瓊輪舉盥盥金景散結

虛成萬有高妙咸可翫
王山鬱嵯峨琅海杳無岸
暫賞過千椿遐齡誰復筭

招攜紫陽友合宴玉清臺
排景羽衣振浮空雲駕來
靈旛七曜動瓊障九光開
鳳舞龍璫奏蚪軒殊未迴

高昇紫極上宴此玄都岑
玉藥散奇香瓊珂流雅音
靈風生太漠習習吹人襟
體混希微廣神疑空洞深
蕭然宇宙外自得乾坤心

上元夫人詩

李白

上元誰夫人偏得王母嬌
嵯峨三角髻餘髮散垂腰
裘披青毛錦身著赤霜抱
手提羸女兒閑與鳳吹簫
眉語兩自笑忽然隨風飄

王子喬

宋之問

王子喬愛神仙七月七日上賓
天白虎搖瑟鳳吹笙乘騎雲氣
喻日精喻月精長不歸遺廟今
在而人非空望山頭草草露濕
君衣

玉真仙人詞

李白

玉真之仙人時在太華峯
清晨鳴天鼓颺歛騰雙龍
弄霓不輟手行雲本無蹤
幾時入少室王母應相逢

夢太白西峯

常建

夢寐昇九崖杳靄逢元君
遺我太白峯寥寥辭垢氛
結宇在星漢宴林閉氤氲
簷楹覆餘翠巾鳥生片雲
時往溪谷間孤亭晝仍曛
松峯引天影石瀨清霞文
恬目緩舟趣霽心投鳥羣
春風又搖櫂潭島花紛紛

苦篁調笑引

李賀

請說軒轅在時事伶倫采竹二十四伶倫采之自崑丘
軒轅以之調元氣當時黃帝上天時二十三管咸相隨
唯留一管人間吹無德不能得此管此管沉埋虞舜祠

少室山韋鍊師昇仙歌

皇甫冉

紅霞紫氣甚氤氲絳節青童迎少君忽從林下昇天去
空使時人禮白雲

宿青牛谷梁鍊師仙居

楊衡

隨雲步入青牛谷青牛道士留我宿可憐夜久月明中

唯有壇邊一枝竹

玄都壇歌寄元逸人

杜甫

故人昔隱東蒙峯已佩含景倉精龍故人今居子午谷
獨在陰崖結茅屋屋前太古玄都壇青石漠漠松風寒
子規夜啼山竹裂王母晝下雲旗翻知君此計誠長往
芝草琅玕日應長鐵鎖高垂不可攀致身福地何蕭爽
寄全椒山中道士

韋應物

今朝郡齋冷忽念山中客澗底束荆薪歸來煮白石欲

持一瓢酒遠慰風雨久落葉遍空山何處尋行跡

洗心

道士司馬退之

不踐名利道始覺塵土腥不味稻粱食始覺神骨清羅
浮奔走外日月無短明山瘦松亦勁鶴老飛更輕逍遙
此中客翠髮皆長生草木多古色難犬無新聲君有出
俗志不貪英雄名傲然脫冠帶改換人間情去矣丹青
步向曉雲冥冥

齋心

王昌齡

女蘿覆石壁溪水幽濛朧紫葛蔓黃花媚媚寒露中朝
飲花上露夜卧松下風雲英花為水光彩與我同日月
蕩精魄寥寥天府空

寄菖蒲


張籍

石上生菖蒲一寸十二節仙人勸我食令我頭青面如
雪逢人寄君一絳囊書中不得傳此方君能來作棲霞
侶與君同入丹玄鄉

金璫玉珮歌

顧况

贈君金璫太霄之玉珮金鎖禹步之流珠五嶽真君之
祕籙九天丈人之寶書東井沐浴辰已畢先進洞房上
奔日借問君從何處來黃姑織女機邊出



唐文粹卷十七下